

# ОЛНД ÖГДГ ДÖНЪ

Союз Советск Социалистическ Республикин граждаимудт кöгшрх наснд, кучн-чидлан геесн цагт болн гемтсн цагт öгдг материалн теткүлин зöвиг Алдр Октябрьск социалистическ революцин диилврмүдин негнь болдж ирсн учрар, СССР-ин Конституций батлсмн. Мана Хальмг таньгчин ганцхн Каспийск района социальн теткүлин отделд пенсий авдгнь 800 күн.

Öмн джилмүдт эн улст 92.300 арслнь мөнъг сардан öгчәсн болхла, шин закон гарснас авн 175.000 арслнь мөнъгн öггдджәнә. Улгүрнь келхд, кöгшн болад пенсий авчасн Зайченко Семен Дмитриевич, Шляхов Петр Семенович öмннь 150-д арслнь авчасн болхла, ода, шин закона хöөн, 624-д арслнь мөнъг сардан авчацхана.

Бийсинь асрх күн уга болсн учрар, Сапралиева Гульшурун, үксн залугъиннь хойр үрндән урднь, 225 арслнь авчасна ормд, ода 573 арслнь мөнъг авчана. Смирнова Матрена Ивановна—543 арслнь мөнъг авна. Инвалид Иванов Сергей Петрович урд джилмүдт 241 арслнь мөнъг авчасна ормд шин закон гарснас авн—575 арслнь авдг болв.

Каспийск рәйонд, социальн теткүлин пенсий авчах улсас талдан, олн күүкдтә болн ганц бийтә экнр болдж 520 күүнд 37.000 арслнь сардан öггднә. Туунәс талдан, пенсий авч улст 1956-ч джилд социальн теткүл—3500 арслнь дөнъ öггдв. Района колхозмуд, совхозмуд болн предприятияс пенсий авдг улст дөнъ гидж 10.000 арслнь мөнъг öгв.

**К. ЛЕВЧЕНКОВА**  
Каспийск района социальн теткүлин отделин ахлач.